



Da Castasegna deriva il deputà Maurizio Michael ed a Samignun ha el vül cumprar eglirs.



A far cumpras è er stà deputà Georg Fallet.

# Da «Chanel Allure» fin «Dolce & Gabbana»

Samignun: Deputadas e deputads sin tur da cumprar en

DA GION NUTEGN STGIER / ANR

■ **Sco enonuschent è Samignun liber da dazi uschia ch'ina gronda part da la populaziun viva da tuts quels che vegnan en il lieu per cumprar en. Dasper il turissem è pia er quel aspect da gronda impurtanza per l'economia locala.** Samignun, il lieu svizzer al cunfin cun l'Austria e l'Italia, è betg mo ina vischnanca turistica cun in grond territori da skis, mabain er in lieu cun bleras butias e blers negoziis. Sco quai che *Hans Kleinstein*, il president da vischnanca, ha ditg ha Samignun tranter 30 e 40 affars nua ch'i vegn cunzunt fatg venal spirituosas, parfums, vestgadira, bischutaria ed uras. Fatg gronds affars han quels da Samignun lura er cun ils tancadis e cun la vendita da benzina. Actualmain custa in liter benzina 1.47 francs e l'onn passà en vegnids vendids radund 13 milliuns liters benzina e diesel.

**In regress da 30%**

Dapi il 1892 ha Samignun il status liber da dazi e senza l'introducziun da quella mesira fiss il lieu pli probabel gia decen-

nis in'alp. Be grazia a la zona senza dazi ha la populaziun survivi e be grazia al gudogn da quel commerzi è vegni avant 40 onns investà, construi hotels ed anc dapli butias. Gia intgins onns viva la populaziun da Samignun betg mo dal turissem da cumprar en, mabain er dals blers giasts che vegnan l'enviern per ir cun skis e la stad per viandar. Dapi la colliaziun dal territori da skis da Samignun ed Ischgl il 1979 appartegna quel tar ina da las popularas regiuns per ils skiunzs. Da preschent profitescha Ischgl dapli da la situaziun dal franc svizzer ferm e da l'euro bass che Samignun, ha ditg Hans Kleinstein, il president communal. Blers giasts da Samignun giajan ad Ischgl a cumprar en nua che actualmain i saja prest anc pli favuraivel per far las cumpras. Hans Kleinstein ha era ditg che dapi il 2009 hajan las butias da Samignun gi tar la svieuta in regress da bunamain 30%.

**Strusch cumprà spirituosas**

Samignun viva pli u main be da giasts svizzers e da turists da la Germania. Da preschent mancan dentant gist ils Tu-

destgs cun esser l'euro uschè bass, però er ils Svizzers vegnan betg pli en rotscha en il lieu cun dazi liber. Hans Kleinstein di che Samignun haja 45% giasts da la Svizra e 40% giasts da la Germania. Quest'emna ha il lieu vischin da l'Austria e da l'Italia strusch gi giasts da vacanzas, persunter han las deputadas ed ils deputads da noss chantun dà dapli vita a la vischnanca per intgins dis. Natiralmain che er las commembras ed ils commembers dal parlament grischun han nizzegià l'ocasiun dad ir a cumprar en en ina da quellas 40 butias. Aposta per ir a far cumpras è la sessiun da mardi ida a fin gia a las 17.15 uschia che dunnas ed umens han gi avunda temp per ir a dar or raps. Ils umens han cunzunt cumprà parfums per lur dunnas, chalzers e gaccas, dentant che las dunnas han cumprà vestgadira da marca e quai per in pretsch favuraivel. Strusch cumprà han las deputadas e deputads spirituosas, cigarettas e cigaras. Tut en tut en els dentant stads a Samignun betg per far «shopping» e dolce vita, mabain per sa fatschentar cun actas politicas.



In nov satgados per deputà Jakob Barandun e deputada Elita Florin-Caluori.



Quels deputads han renunzia al «shopping», persunter en els ids tar l'apéro en ina da las bleras bars: Bruno Tscholl, Daniel Buchli, Ernst Nigg, Leonhard Kunz e Giatgen Peder Fontana (da san.).



In parfum ha cumprà deputà Jan Koch.



Er Ernst Sax, deputà da Sursaissa, è i a far cumpras.



Las duas deputadas Beatrice Baselgia-Brunner (san.) e Leta Steck-Rauch en ina da las bleras butias da Samignun.



Ha cumprà novs chalzers: deputà Theo Joos (san.)



La deputada Annemarie Perl en ina butia da chalzers.